

উপস্থিতি



আইন অনুযায়ী, বাধ্যতামূলক স্কুল-শিক্ষার বয়সের (সাধারণত ৫ থেকে ১৬ বছর) সকল শিশুকে অবশ্যই উপযুক্ত ফুলটাইম শিক্ষা গ্রহণ করতে হবে। অভিভাবক হিসেবে, আপনার সন্তানদের ক্ষেত্রে এই বিষয়টি নিশ্চিত করার আইনি দায়িত্ব আপনারই। কোনো স্কুলে আপনার সন্তানের নাম নথিভুক্ত হওয়ার পর, তারা যাতে নিয়মিত স্কুলে উপস্থিত থাকে তা নিশ্চিত করার আইনি দায়িত্ব আপনার ওপর বর্তায়। এর অর্থ হলো, আপনার সন্তান যেন কোনোভাবেই বিনা অনুমতিতে স্কুল বা ক্লাসে অনুপস্থিত না থাকে। এমনটা না করলে আপনাকে জরিমানা করা হতে পারে।

ইনসেট দিন



প্রতি শিক্ষাবর্ষে স্কুলগুলোতে ৫টি ইনসেট দিন থাকে। ইনসেট-এর দিনগুলোতে স্কুল বন্ধ থাকে এবং আপনার সন্তানকে স্কুলে যেতে হয় না।

ইনসেট দিনগুলো মূলত কর্মীদের প্রশিক্ষণের কাজে ব্যবহার করা হয়। আপনার সন্তানের স্কুলের ইনসেট দিনগুলো কবে নির্ধারিত হয়েছে, তা জানতে স্কুলের সাথে যোগাযোগ করুন।

শিক্ষাবর্ষ চলাকালীন সময়ে ছুটি



সন্তানদের পড়াশোনায় যাতে ব্যাঘাত না ঘটে, সেজন্য আপনি স্কুলের ছুটির সময়েই সপরিবারে ভ্রমণে যাওয়ার পরিকল্পনা করবেন বলে আশা করা হয়। শিক্ষা-সংক্রান্ত আইন অনুযায়ী, শিক্ষাবর্ষ চলাকালীন বেড়ানোর উদ্দেশ্যে সন্তানকে স্কুল থেকে অনুপস্থিত রাখার কোনো অধিকার অভিভাবকদের নেই। কেবল বিশেষ পরিস্থিতিতেই স্কুলের প্রধান শিক্ষক ছুটির অনুমতি দিতে পারেন; অনুপস্থিতির কারণটি সত্যিই বিশেষ কি না এবং কত দিনের ছুটি মঞ্জুর করা হবে—সে বিষয়ে সিদ্ধান্ত নেওয়ার এখতিয়ার প্রধান শিক্ষকেরই।

বিনামূল্যে স্কুল মধ্যাহ্নভোজ



আপনি আপনার সন্তানের জন্য বাড়ি থেকে দুপুরের খাবার (প্যাকড লাঞ্চ) পাঠিয়ে দিতে পারেন; বাসা কাছে হলে তারা দুপুরের খাবারের জন্য বাড়ি ফিরে আসতে পারে অথবা স্কুলেই খাবার কিনে খেতে পারে।

অধিকাংশ মাধ্যমিক বিদ্যালয়ে দুপুরের খাবারের সময় ক্যান্টিন চালু থাকে। শিক্ষার্থীরা গরম ও ঠান্ডা—বিভিন্ন ধরনের খাবার থেকে তাদের পছন্দমতো খাবার বেছে নিতে পারে এবং সেখানে সবসময়ই নিরামিষ খাবারের ব্যবস্থাও থাকে।

আপনি যদি নির্দিষ্ট কোনো সরকারি ভাতা পেয়ে থাকেন, তবে তৃতীয় থেকে একাদশ বর্ষের শিক্ষার্থীরা **বিনামূল্যে স্কুলের খাবার** পাওয়ার যোগ্য বলে বিবেচিত হবে। আপনি [এখানে](#) আপনার যোগ্যতা যাচাই করতে পারেন এবং আপনার সন্তানের জন্য বিনামূল্যে স্কুলের খাবারের সুবিধা পেতে অনলাইনে আবেদন করতে পারেন। এছাড়া আপনি হালান খাবারসহ বিশেষ খাদ্যাভ্যাস বা ডায়েটের জন্যও অনুরোধ জানাতে পারেন।

বাড়ির কাজ



অধিকাংশ শিক্ষার্থীর জন্য বেশিরভাগ বিষয়েই প্রতি সপ্তাহে বাড়ির কাজ দেওয়া হবে। এ বিষয়ে বিস্তারিত জানতে আপনার সন্তানের শিক্ষকের সাথে কথা বলুন। মাধ্যমিক বিদ্যালয়গুলোতে সাধারণত অনলাইন প্ল্যাটফর্ম বা ভিএলই-এর মাধ্যমে বাড়ির কাজ দেওয়া হয়, তাই তা সম্পন্ন করার জন্য আপনার সন্তানের কম্পিউটার ব্যবহারের সুযোগ থাকা প্রয়োজন। অনেক সময় বিদ্যালয় বিনামূল্যে 'হোমওয়ার্ক ক্লাব'-এর আয়োজন করে, যেখানে শিক্ষার্থীরা বিদ্যালয়ের কম্পিউটার ব্যবহার করতে পারে এবং প্রয়োজনে সহায়তা পেতে পারে। কোনো শিক্ষার্থী বাড়ির কাজ সম্পন্ন না করলে সাধারণত তাকে এক ঘন্টা পর্যন্ত অতিরিক্ত সময় বিদ্যালয়ে আটকে রাখার শাস্তি দেওয়া হতে পারে। কখনও কখনও বিরতির সময় এই শাস্তি কার্যকর করা হয়। যদি স্কুল ছুটির পর এই শাস্তি দেওয়া হয় বা সমস্যাটি অব্যাহত থাকে, তবে আপনাকে তা জানানো হবে।

'প্যারেন্টস ইভনিং' এবং স্কুল রিপোর্ট



আপনাকে 'প্যারেন্টস ইভনিং' বা অভিভাবক-শিক্ষক সাক্ষাতের অনুষ্ঠানে যোগ দেওয়ার জন্য আমন্ত্রণ জানানো হবে এবং আপনার সেখানে যাওয়াটা জরুরি। বেশিরভাগ স্কুলই সাক্ষাতের জন্য বিভিন্ন সময়সূচি বা 'টাইম স্লট' দিয়ে থাকে, যার মধ্য থেকে আপনি আপনার সুবিধামতো সময় বেছে নিতে পারেন। সন্তানের পড়াশোনা বা শেখার বিষয়ে আপনার কোনো প্রশ্ন থাকলে, শিক্ষকের সাথে সাক্ষাতের সময় আপনি তা জিজ্ঞাসা করতে পারেন। শিক্ষাবর্ষের শেষে আপনার সন্তানের অগ্রগতির বিষয়ে একটি প্রতিবেদন বা রিপোর্টও আপনি পাবেন বলে আশা করতে পারেন। সন্তানের অগ্রগতির হার যা-ই হোক না কেন, সে স্বয়ংক্রিয়ভাবেই পরবর্তী শ্রেণিতে উন্নীত হবে—কারণ যুক্তরাজ্যে কোনো শিক্ষার্থীকে একই শ্রেণিতে পুনরায় পড়াশোনা করতে হয় না।

স্কুলে যাতায়াত



আপনার সন্তান বাড়ি থেকে স্কুলে যাওয়া-আসার জন্য বিনামূল্যে যাতায়াত সুবিধার যোগ্য বলে বিবেচিত হবে **যদি—**

- তারা তাদের এলাকার জন্য নির্ধারিত নিকটতম স্কুলে (ক্যাচমেন্ট স্কুল) অথবা আপনার বাড়ির নিকটতম অবস্থিত কোনো স্কুলে পড়াশোনা করে

এবং

- ৮ বছর বা তার কম বয়সী শিশুদের ক্ষেত্রে বাড়ি থেকে স্কুলের দূরত্ব দুই মাইলের বেশি হয় অথবা ৮ থেকে ১৬ বছর বয়সী শিশুদের ক্ষেত্রে দূরত্ব তিন মাইলের বেশি হয়।

আপনার সন্তান যদি এই শর্তগুলো পূরণ করে, তবে যাতায়াত সুবিধার জন্য আপনাকে আবেদন করতে হবে।

লিংকস



[ইতিবাচক আচরণ পরিচালনার কৌশল](#) এবং [একাধিক ভাষায় সন্তানকে বড় করে তোলা](#)—এই বিষয়গুলোর তথ্য বিভিন্ন ভাষায় অনূদিত আকারে পাওয়া যাচ্ছে।

তথ্য: [স্কুলে উপস্থিতি](#) ও শিক্ষাবর্ষ চলাকালীন ছুটি

তথ্য: [স্কুলে যাতায়াত ব্যবস্থা](#)

স্কুলের [ছুটির তারিখসমূহ](#)